

## Letse seniorenversjlaag van ut seizoen mit... unieke input oet Aelse!

Ut seizoen zit d'r veur de meeste teams op. En dat beteikent dat ut tied is om ens de tied te numme om trökblik te blikke. En ut sjieke is dat dat veur de meeste teams unne hele positieve trökblik oplevert. Wiejer in dit versjlaag waer de neudige foto's en informatie oet ut randjgebeure.


En wedsjtriedversjlage dan? Helaas bliek dat ozze reporters op dit moment te druk en/of te oetgeblust zeen om nog de pen op te pakken. En dat rech höbbe ze. Want auch dit seizoen höbbe veer waer allemoal moage geneite van de wedsjt Reidversjlage, foto's, snitch-sjtreke en humor dae woort aangeleverd door ozze onbetaalbare reporters. Op deze plaatsj dan auch un heel groot woord van dank aan dit sjterren-ensemble:

- Jari Knoops, clubman pur sang, barman, captain van ut tweede, oethelper bie alle angere legere elftalle.
- Timo Haberland, buttelaer op ut middenveldj bie 1, en opper-snitch in ut kleidlokaal van os eesjte elftal.
- Joep Keulen, initiator van os driede elftal, oethelper in de JO19, en kommend seizoen al vasgelag es social media director van de JO19.
- Ralph Doek, facebook en website-wizard, patron en motivator van ut veerde, en kartrekker van ut 35+ team.
- Yael Beaujean, sjterkhouver en oetbinker in os damesteam, oethelper in legere heren-teams en sjriever van geweldige alles-onthullende inkiekskes.
- Huub Lenzen, doorbraeker van de walking football-omerta en super-waardevol deiler van contacten oet Belsj.
- Randy Wanten, veurmalig milfhunter, veurmalig topvoetballer, maar nog ummer grote gangmaker en op en top clubman.
- Willem Thewissen, dae de honneurs bie de veteranen woarnump es ongergeteikende unne keer aafwezig is, en dae dan leet mirke dat ut sjriever van un pakkend versjlaag auch kunst kent zeen.

Dame en heren, van harte dank veur ugge geweldige inzet ut aafgeloupe seizoen. Sjiek dat veer dankzij uch (bienoa) waekelijks höbbe kenne lachen om alles wat d'r binne en rondjom os clubke gebeurt.

Loate veer maar ens beginne mit de trökblik op dit seizoen. Te beginne mit os eesjte elftal. Dat houw nogal un wisselvallig seizoen en leek effe in degradatienood te komme. Maar dankzij unne machtige eindsjprint woort ut seizoen aafgesjloate mit un respectabel puntenaantal en un dikke veilige plek op de ranglies. Aafgeloupe zondig woort ut seizoen in

sjtijn aafgesjloate mit un 0-1 euverwinning bie BSV Limburgia. Lekker tied veur un feeske dus. Al bleek d'r bie terugkeer op de parkeerplaatsj in Sjtein veur eine sjpeler un minder leuke verrassing. De sjeidsrechter van ut tweede (81 joar) bleek namelijk mit ziene auto taege de auto van De Sjter 1 captain Davy Hodselmans opgezaete te höbbe. Ut woort opgelost mit un net briefke:



Bie ozze captain koosj dat de pret echter neit drukke. A la LeBron James woort ut klassebehoud gevierd mit unne dikke Cubaan.



Mannen van 1, proficiat mit uch prima prestatie. Mit un krappe selectie en un herkenbaar regionaal team lijfsbehoud in de 1<sup>e</sup> klasse realiseren is un top prestatie. Unne prima basis om kommend seizoen op wiejer te boewe mit Pedro veur ut tweede seizoen aan ut roer!

Dan door noa os tweede elftal. Auch dat team leverde un wereldprestatie. Onger leiding van technisch duo Henri en Stef zat dat team un belachelijk sjterke ongesjlage serie neer, die pas aafgeloupe weekend woort doorbroake door de ongenaakbare kampioen Meerssen 2. Maar ozze jonges kenne mit un driede plaatsj op de ranglies trökkieke op un top seizoen. Zeker es in ougensjouw wurte genomme dat ut team besjiteit oet veurnamelijk jonges die pas veurig joar de euversjtap vanoet de jeugd gemaak höbbe, aangevuld mit ervaren Sjteinder krachten wie Jari Knoops, Youri Voesten, Luc Spaans en Frank Haenraets.

Euver dae letste gesjproake.. auch dae vonj ut zondigoavend un prima moment om unne dikke Cubaan op te sjtaeke:



Euveriges, veur de luuj die ut niks vinje dat d'r in dit versjlaag allemoal foto's van roukende jong men sjtoan... weit dat os jonges unne gezonje laeves-sjtijl höbbe en dat ut sjus kaerskes zeen... ze rouke allein es ze oetgoan.

En veur alle anti-roukers nog effe un citaat dat Willem Thewissen geregeld leet heure: "Ich rouk neit, ich ben van michzelf al sjtoer."

Veur ut tweede sjeit d'r nog un toetje op ut programma in de vorm van promotie-playoffs taege SHH 2. Jonges, voal succes in die dubbele krachmaeting. Veer zeen, ongeach de oetkomst, greutsj op uch!

Dan os driede elftal. Dat besjting dit seizoen veurnamelijk oet hele jonge jonges, onger leiding van de aevenens jonge Joep Keulen. Ut team bleek in unne competitie te zitte dae beheurlijk te sjterk woar en dat woar natuurlijk neit prettig veur de motivatie van de mannen van 3. Zunj want d'r woort, mit name door Joep, waal ontzettend voal tied in gesjtoake om jeder weekend de men biejein te krieger. Helaas moosj rondj de winjtersjtop de conclusie getrokke waere dat 't geine zin houw om door te goan. Veer hoape echter dat de jonges die d'r dit seizoen gevoetbald hobbbe toch un plek goan vinje binne os vereiniging en mesjiens kommend seizoen unne doorsjartart kenne make. Joep, doe in jeder geval hartsjtikke bedank veur diene inzet!

Effe un ziesjtepeke noe. Want d'r wurte natuurlijk unne houp euver de voetballers gesjreve. Maar d'r zeen auch luuj die jeder waek heel get wedsjtrieje es supporter mitpikke. Ein van die mannen is Patrick Smeets. Veurmalig eesjte elftalsjpeeler, papa van Mylan (De Sjter 2) en Luca (JO17), en man van Rozien (sjponsorcommissie). En ondanks ut feit dat Patrick zelf gein formele functie vervult, is hae waal ut gezinslid dat ut vaakste op 't Hetjen te vinje is.

En dat Patrick dan ummer sjerp is op de sjportprestatie die hae zuut, blik waal op dees foto. Want ze kenne bie dae formule 1 waal de tieje maete in doezendsten van seconden, maar of die tiedwaarnumming ummer klopt... zo wie Lenin al zei: "vertrouwen is goed, maar controle is beter".



Door noa De Sijter 4. Dat team haet nog twee wedsjtrieje op ut programma sjtoan maar de plaatsj op de ranglies kent neit meer verangere. Ozze mannen moage greutsj zeen op un top seizoen, want mit 13 euverwinningen in 19 wedsjtrieje woort besjlaag gelag op de tweede plaatsj op de ranglies. Al deit ut veur ozze mannen natuurlijk altied un klein bietje pien dat de mannen oet Aelse ut kampioensjap höbbe binnegesjleip. Van de angere kantj: derby's zeenop ut veldj ummer op ut sjerpst van de snede, maar noa de wedsjtrieje vinj ich ut perseunlijk ummer prima toeven in de kantine in Aelse.

Bie ut veerde loupe heel get unieke figuren rondj. Ich höb eerder dit seizoen al ens alle sjpelers aan uch veurgesjteld. Ich beperk mich bie deze trökblik tot un drietal sjpelers. Te beginne mit de einige sjpeler van ut veerde dae dit seizoen bie ut eesjte op de bank haet gezaete: keeper Mylano Luijten. Auch waer zonne echte clubman dae auch neit te beroerd is om oet te helpe bie angere teams, bie de jeugd, of zelfs te vlaggen bie ut tweede wie aafgeloupe zondig.

Doanaeve is ut volkomme terech om sjpits Bart Linders in de picture te zette. De aardigste en leukste jong van de ganse vereniging dae dit seizoen ongekend los is gegange qua scoren en doomit besjlaag haet gelag op de gouwe sjoon. Ziene pap, zelf oud prof en oud topscorer, Jack woar veurige waek bie de veteranen in de kantine en leet toen mirke wie greutsj hae is. Jack haet un gans seizoen motte laeze op de groepsapp van de vets dat Pascal Conjour koste wat kost topscorer moosj waere. In Caesar vroeg Jack, gesjpeeld onwekend, aan de sjriever van dit sjtuk: "Wae geit noe eigenlijk de gouwe sjoon winne dit seizoen, Rob?" Jack, ut is diene jong van harte gegund. Bart, klasse prestatie en dik verdeind.

En dan moag d'r nog aandacht zeen veur unne man dae ut dit joar hartjikke druk haet gehad es liesttrekker bie de gemeenteroadsverkeizinge, en dat moosj combinere mit topsjport bie ut veerde. Gein wonjer dat de jong op Uropop rondjleep mit unne heusse sixpack:



Mannen van 4, klasse seizoen gedreijd! Nog twee keer vlemmen en dan geneite van de zomersjtop!

Euveriges is net get gesjreve euver de sjpannende sjtrijd om de gouwe sjoon. Aafgeloupe weekend leet de, vanwaege un blessure aafgehoakde, Pascal Conjour zich van ziene sjportiefste kantj zeen:



Dan goan veer door noa of vijfde elftal. Dat team haet kommende zondig heure letste wedsjtried op ut programma sjoan. Bie winst eindigen ozze jonges op een sjieke derde plaatsj op de ranglies. Auch hie is dus un dik compliment op zien plaatsj.

In os vijfde loupe un heel aantal opvallende individuen rondj. René Gooren natuurlijk: trainer van ozze JO19, vaste oethelper bie allerlei teams, vaste kantinegast, mede organisator van de voetbalwaek en beste verteller van sjlechte moppen. Randy Wanten lup d'r auch rondj. De veurmalige flitser op de rechterflank op ut eesjte lup noe de sjpelverdeiler en patron oet te hange op 5 en deit dat absoluut verdeinstelijk. En wat te denke van topcoach Tim Bouwels, dae un tactiek wis te verzinnen wobinne al dees unieke figuren koosjten renderen, en dae auch nog ens heel get kere de veteranen haet oetgeholpe dit seizoen.

Maar de man dae ich gaer in the picture wul zette is eine dae dit versjlaag gaar neit kent laeze omdat hae gein Limburgs sjprik of lees, en ich gein Fries ken typen. Keeper Gerrit, vaste man onger de lat bie 5, haet dit seizoen geweun un aantal wedsjtrieje op ut eesjte gekeep. Wie sjiek is dat?

Tja, en wat deisse dan noa zo'n succesvol seizoen? Dan geisse effe relaxen op Urpop, get meziek loestere, get ouwehore en dich eine drinke. Dan mosse allein neit un flesj wien oet de henj loate valle, in unne reflex die wulle vange, wonoa 'r onhenjig en ongelukkig op unne vinger vilt...



Ach ja, dat is kommend seizoen waal waer genaeze. En dan is Gerrit geweun waer de vliegende keep dae in al os (heren) seniorenteam zien wedsjtriedje kent keepen. Mannen van 5, proficiat mit un sjterk seizoen en op noa kommend joar!

Tja, en dan hōbbe veer nog os dames team. Ut einige team van os vereniging dat twee daag langk lanjelijk nuujts woar in mei, noadat d'r unne luchtballon midde op ut sjeelveldj un noodlanjing maakde. Ozze ladies dreijden op zich un prima seizoen mit sjoon resultaten. Maar wie langer ut seizoen doerde des te lestiger woort 't (door blessures en vakanties) om waekelijks un team op de bein te bringe. Ut team eindigde veur ozze ladies dan auch veurtiejig. Maar mit frisje moud en heel voal inzatz wurt d'r achter de sjerme al gewirk aan de selectie veur kommend seizoen. Dat geit gans goud komme. Geneit van de vakantie, dames!

En dan besjikke veer binne os vereniging auch nog euver teams die geine échte competitie sjele maar die waal geregeld in actie komme. Ozze walking footballers, ozze 35+ ladies en ozze 35+ heren. Auch die teams hōbbe sjtuk veur sjtuk un prima seizoen achter de rugk.

Tja, en dan rest os nog ein team te besjpraeke. Ut einige team dat waal nog besjikke euver unne reporter dae kans zoog om get aanteikeninge te make en get op papier te zetten. Ozze veteranen inderdaad. Die sjeelden ongerhauf waek geleje nog unne wedsjtried oet taeg Caesar en veurig waek op de vriedigoavend nog un toernooi bie datzelfde Caesar.

Euver de belaevenisse van die beide sjeeldaag kal ich uch gaer nog bie. En ich hōb doobie auch nog un leuke verrassing veur de troew laezers van de veteranenversjlage. Want euver ut toernooi in Baek wurt zelfs versjlaag gedoan vanoet twee versjillende invalshuik.

Loate veer eesj maar ens kieke noa de wedsjtried in Baek en ut toernooi tot ut letste beware. Geer hōb al ut ganse seizoen kenne laeze dat secretaris Willem T. jeder waek ontzettend voal muijtte mot doon om un ploug op ut veldj te kriege. Zo auch waer in Baek.

Ut raegende afmeldingen en dus woare d'r maar 10 eige sjpelers besjikbaar. De vaste oethelpers (Habets, Frijters, Bouwels, Nacken, Gooren) woare auch allemoal verhinderd en dus woort un beroep gedoan op un duo dat gemiddeld ruim boave de 40 is: Jean Maas en Ken Marchal.

Jean houw veur de gelegenheid zien kapotte voetbalsjooon nog maar ens ingetape zodat hae in zien eige Baek koosj sjittere.



In ut kleidlokaal ontsjpon zich veur de wedsjtried un laevendige discussie euver unne sjpeler van Ajax, wo de meininge nogal verdeild euver woare.

Willy: Dae kent toch helemoal niks. Unne sjlappe zak is ut.

Piele: Willy, doe bes ummer negatief euver Daley Blind. Ich venj dem good.

Willem: Ich auch. Dae zuut dinger al veurdat ze gebeure.

Jos: Joa, dat compenseert zien gebrek aan sjnelheid.

Willem: Houws doe dat dan auch maar Jos, want doe bes auch neit de sjnelste.

Coach Roger woar ut 4:4:2 systeem un waek eerder taegge Geulsche Boys prima bevalle en dus woort auch noe waer dat systeem gesjpeeld.

Kis: Rudy

Achter: Patrick, Piele, Gerard en Marc

Midde: Bart, Jean, Rob en Jos

Veur: Roy en Ken

Bank: Ruud

Vlag: Willy

Coach: Roger

Assistent: Willem

De eesjte helf woar De Sjter de baetere ploug, maar in de score drukte zich dat nog neit oet. De mannen oet Baek woare veural druk mit zich beklage euver de laeftied van Ken Marchal, auch al sjpeelde dae beheurlijk mit de handjrem d'r op.



De score woort geoapend door Rob, dae unne veurzet van Jos aannoom en mit links in de lange houk sjoof. De reactie van Caesar leet neit lang op zich wachten en al sjnel sjting ut waer geliek. Doanoa woar ut opnuuj unne aanval euver links, wobie Marc unne veurzet goof dae zó troag woar dat drie man veur de goal zich d'r op verkeke, wonoa Bart bie de 2<sup>e</sup> poal de 1-2 koosj aanteikene. Helaas heel auch dae veursjprong gein sjtandj. Gerard Martens veroverde unne bal in de 16 door ziene taegesjtenjer unne sjouwerduuj te gaeve en woort toegeroupe: "Rust! Alle tied!".

Gerard noom dat gét te letterlijk en noom zich de tied om un oplossing te zuike. Ziene taegesjtenjer woar intusje opgekrabbeld, houw zich euver ziene pienlijke knei gewreve, houw zich vervolges de zukke waer opgetrokke, de sjoonveters waer gebonje, zich beklaag bie de sjeidsrechter, bie de dug out effe oet un bidon gedronke, get rek- en sjtrek-oefeninge gedoan, un puupke geloate, aan unne supporter gevroag wie lang ut nog woar tot aan de rust, gezjwejd op zien vrouw in de kantine, twee e-mails beantjwoord op de tillefoon, un indische riestoafel besjteld bie de chinees in Baek veur 8 oer dae oavend, effe aan zien böl gekrats, un sigaretje gerouk, en effe noa ut tennisse gekeke, om vervolges de bal van de vout van Gerard te loupe en de 2-2 te scoren.

De sjeidsrechter float geliek veur de rust. In ut kleidlokaal woar mit name Roy Vanmulken verbolgen.

Roger: En Gerard?

Gerard: Ze zeije doog rustig aan.

Roger: Joa, dat deigse inderdaad.

Roy: Godmiljaar jonges, d'r is auch geine hondj dae unne medesjpeler coach!

Piele: Veer durve niks te zegke taege dich Roy. Bang datse waer kwoad wurs.

Gerard: Hallo jonges, ich kom net truk oet un zjwoar blessure he.

Willem: Dan zou ich nog maar ens trök goan mit dae knei.

In de tweede helf leek ut op un bloeddeloos gelieksjpel oet te dreije. De bal leek d'r neit meer in te wulle. En de sjeidsrechter leek de gelieke sjtandj auch neit te wulle bederven. Zelfs neit wie Bart in de 16 vrie-worstelend noa de grondj woort getrokke en in unne houdgreep woort gelag.

Tot euvermaat van ramp woar ut 5 minute veur tied nog Caesar dat scoorde. De bal woort langs Rudy gesjove wonoa op de doellien nog unne sjpeler ut letste tikske goof.

Grensrechter Willy heel de vlag sjtrak noa onger, maar de gael-zjwarten appelleerden dat dit toch boetesjpel moosj zeen. De sjeidsrechter ging doa in mit en keurde de goal aaf. Tot ergernis van de Caesar sjpelers natuurlijk.

Tot euvermaat van ramp woort vervolges nog Ken Marchal twee keer de deipte ingesjturd. Ken heel zich dees kere neit in en ronjde de sjtaekpasses van Roy en Rob vakkundig aaf en bepaalde zo de eindsjtandj op 2-4. De pass van Roy woar euveriges neit heel precies, wodoor ut leek dat twee Caesar sjpelers koosjten ingriepe. Ken tikte de bal echter net langs ze wonoa die twee elkaar ongesjteboave lepe.

Ken: Dae pass houw get meer noa links gemotte, Roy.

Roy: Wiezo? Dan woare die twee neit taegenein aan geloupe.

Noa de wedsjtried woorte veer prima verzurg in de kantine in Baek. De snacks bleve maar komme en wie dat té gortig woort, besjloot coach Roger ze te confisqueren om te veurkomme dat de angere vets hun afgetrainde summerbodies zouwe vergoaien.



De pinten sjmaakten goud en d'r woar alle tied om effe te kieke of d'r waal un selectie biejin gekrege koosj waere veur ut 7 taege 7 toernooi in datzelfde Baek 6 daag later.




Sjiek euveriges dat de mannen die nog glansrollen vervulden en nummers 1 en 2 in de veteranen-pikorde woare wie ich mien eesjte seizoen bie de vets sjeelde, aanwezig woare in Baek. Want naeve auwt coach Frans Janssen woare auch veurmilig topkeeper René Hillen en veurmilig topsjpts Jack Linders doa. Twee absolute coryfeeën. Van de huidige generatie veteranen komme enkel Willem, Ron, Mat en Gerard in de buurt bie de verdeinsten die deze twee grootheden veur de Sjteinder vets hōbbe gehad. Sjiek dat geer doa woort, René en Jack! En auch sjiek das doe doa woars Frans, maar dich zeen veer natuurlijk get dèkker.

De bie de wedsjtried aafwezige veteranen woare vanzelsjpraekend erg benuujd noa de verrichtingen op de wei:



Vervolges volgde un puntige samenvatting van de handj van de sjriever van dit sjtuk:



D'r waar echter eine man dae un omissie in dat relaas besjpeurde:



Willem besloot vervolgens om toch auch unne spotlight te zette op unne mede-veteraan:



Dan door noa veurige waek vriedig. D'r sjting dus un toernooi op ut programma in Baek. Doa woorte diverse toernooitjes afgewirk op eine aovend. D'r woare get recreatieve teams, damesteams en un veertal veteranen-teams. Allemaal op hauf veldj dus ut woar gét mekkelijker om de luuj biejein te kriege.

Veer houwe flink doorgeselecteerd zodat allein de aller-allerbesten mit mochten noa Baek. In de goal woar, vanwaege de kleinere goalkes op un hauf veldj, gekoaze veur de sjerpste raeler aller veteranen, Ronnie M. In de defensie woorten Ruud van Didden en Patrick Dewaide oetverkozen om te probere om Gerard oet ziene vormdip te trekke. Jos Ostendorf woort es sjpelbepaler en dreh-und-angelpunkt op ut middenveldj geselecteerd. En in de veurhoede woort puur noa de verfiende techniek gekeke en noa de vroeg wie complementair sjpelers zeen, wodoor de keuze veel op Roy Vanmulken en Bart Pantus. Dennis Stelten bleef maar bellen en appen en sjmeken en aandringen of 'r auch mit dit elite-korps moch mitvoetballe. Captain Gerard besjloot euver zien hart te sjtrieke en Dennis toetsjumming te gaeve om ongerhauve wedsjtried aan te hoake.

De sjriever van dit sjtuk kreeg auch unne brief van de selectiecommissie en kreeg opdrach om zich veur te richten op ut baetere journalistieke werk en tusjedoor un beetje mit te hobbele es de vedetten un rustmomentje neudig houwe.

De deilnummende plouge aan ut toernooi woare de crème-de-la-crème van ut Zuid Limburgse veteranenvoetbal. De geoliede vechtmachine oet Caesar goof vanzelfsjpraekend acte-de-présence op heur eige toernooi. Auch ut vanwaege heur tiki-taka-sjtijl befaamde Neerbaek maakte zien opwachting. En wat te denke van ut team oet Aelse, dat vanwaege un gebrek aan taegesjtandj van niveau, noa dit seizoen wurt opgeheven, zodat ut talent oet die ploug eerlijk verdeild kent waere euver de angere plouge oet de westelijke mijnsjtreek.

Taegesjtenjers van formaat dus. Un topprestatie woort dus gevraag.

Ut toernooi begoosj veur de Sjteinder vets taege de hoezehoge favoriet Haslou. Esof die ploug van zichzelf nog neit sjterk genog is houw coach Roy Geven auch nog übermensch Oscar Nieskens opgetrommeld. Veer mochten ozze hendjes toekniepe dat veer noa 20 minute mit un 2-2 gelieksjpel (doelpunten Rob en Bart) van ut veldj lepe.

Ut zoog d'r haer oet dat ut unne woare oetputtingssjlaag ging waere. Zaak dus om noa wedsjtrieje goud te hydratering om oetdreuging en doomit gepaard goande kramp-aanvallen noa un sjlopend seizoen, te veurkomme.



Tiedes die rustmomenten woare d'r waer prima gesjprekke op te teikene.

Jos: Jonges ich h**ö**b vandaag 105km gefits. En eerder dees waek 75km.

Gerard: Houfse neit te wirke?

Jos: Ich ben ambtenaer **én** leidinggaevende.

Gerard: Dus doe wirks neit?

Jos: Ja, get koffiedrinke mit de luuj en vroage wie ut mit ze geit.

Ron: Dat deit Tilly van de Bekker auch.

De tweede wedsjtried woar Caesar de taegesjtenjer. Mit voal kunst- en vliegwerk taege unne magistrale taegesjtenjer wisten de gael-zjwarten un bewonderenswaardige nipte 5-2 euverwinning (goale van Dennis 2x, Rob 2x en Bart) te boeken op un iezersjterke toernooiploug-pur-sang.

Doanoa woort waer flink get pils genuttigd en oetgerust veur un letste topprestatie. Doabie koom de zoektocht van captain Gerard noa woonruimte in Sjtein ter sjprake

Ron: Welke club haet noe unne veurzitter dae homeless is?

Jos: Homo?

Gerard: Worum neit? Mit unne laekere kael op ziene tied is auch niks mis.

De derde wedsjtried wisten ozze mannen precies wat ze te doon sjting. Immers, Haslou en Caesar woare al oetgevoetbald. Om ut toernooi te winne moosj mit drie goale versjil gewonne waere taege tiki-taka-Neerbaek. Bie twee goale versjil zouwe veer, op basis van meer gescoorde goale, nipt ut toernooi winne. Maar goud, eesj maar ens uberhaupt probere te winne van 'ut veteranen Barcelona van de westelijke mijnstreek'.

Ut woort unne wedsjtried om van te sjmulle. Beide plougen combineerden dat un leeve lust woar en ut baltempo woar moordend. Gael-zjwart koom op de beneudigde 3-0 veursjprong (goale van Jos, Rob en Roy), maar oet unne penantie scoorde Neerbaek de 3-1. Op dat moment sjtinge Haslou en De Sjter dus precies geliek qua punten, ongerling resultaat en doelsaldo. De Sjter zat nog ens aan veur un sjlot-offensief maar inens veel al ut leich oet op de velje. De oorzaak bleef onbekend, maar de breije grijns van Haslou coach Roy Geven wekte enige vermoedens op.

Protesten bleve oet. Lekker veur de letste keer dit seizoen douchen in un voetbalkleidlokaal en veur de letste keer noa un geleverde insjpanning in un kantien un pilske nuttigen. In aafwachting natuurlijk van de priesoetreiking. En intusje nog effe es sterren-ensemble poseren veur de foto:



Gerard: Bahbah wat woars doe sjlech, Rob.

Rob: Sorry Gerard, ich ken neit baeter.

Gerard: Doe mos bie unne sjaekpass de bal op ut goeie bein insjele.

Ron: Das neit woar. Doe mos sjus ummer op ut sjlechte bein insjele.

Roy: Mien middelste bein is ut sjlechste.

Ron: Joa, dien vriendin haet zich sjus de ganse wedsjtried doa euver zitte beklage richting dien mam, wie ze achter mien goal in de dug out zote.

De afwezigheid van alle leje van de technische leiding woar de sjpelers euveriges unne doorn in ut auch.

Gerard: Wo zeen ze dan? Willem, Willy, Roger?

Rob: Die haute zich neit bezig mit sjpelers oet de B-categorie.

Ron: En auch nog eine oet de C-categorie zelfs.

Rob: Mesjiens hōbbe veer vanoavend waal promotie noa de A-categorie aafgedwonge.

De priesoetreiking koom en oetbinker Roy moch de baeker goan aafhoale. De vets houwe zich verheugd op unne grote trofee want ut team aan de toafel naeve os houw unne hendig grote baeker gekrege veur ut winne van ut recreatieve toernooi. Dae van os bleek un paar moate kleiner te zeen, maar Ron houw de perfecte oplossing.

Ron: Zet mich maar op de foto mit de baeker. Dan liek 'r groter.



Ron dreigde zich noa zien vriendin en zei: Joa sjat, vanoavend ligks doe naeve unne kampioen.

Gerard: Ron, veteranen deile alles.

Jos: Das woar.

Ron: Sjat, doe heurs ut, dat wurt unne gangbang vanoavend.

Vriendin: Sneeuwwitje en de 7 dwergen joa. Maak doa maar ens un foto van..





En zo koom d'r un einde aan un oetdagend veteranen seizoen. Ut woar jeder waek waer sjrape om de sjpelers biejein te kriegen. Maar die 25 kere dat dat lukte, woare ut auch onvergaetelijke weekenden. Op noa kommend seizoen.

En dan h b ich veur uch, beste laezers, noe nog get geweldigs in petto. Want veur ut eesj in de historie van dees waekversjlage h b ich unne versjlaaggaever weite te sjtrikke dae gein lid is van os clubke. Sjterker nog, hae is lid van un onger clubke in os gemeente. Zet uch d'r sjrap veur want geer goat hie onger opnuuj un versjlaag laeze van ut veteranen toernooi in Baek, maar dit keer door de auge van nemes minder es Haslou-veteranen coach Roy Geven.

Want wie eerder in dit versjlaag al is gememoreerd, is rivaliteit op un voetbalveldj prima. Maar boete dat veldj heurse elkaar es burenen geweun alle gouds te gunne en op un leuke maneier mit ein om te goan. Es ut geit om de veteranen van Haslou en De Sjter dan is dat absoluut ut geval. En dat haet in zeer grote mate te maken mit ut aimabele karakter, de humor en de heerlijke oape oetsjtraling van coach Roy.

Es De Sjter veteranen vinje veur ut heel sjprietig om te heure dat men bie Haslou geit sjtoppe mit ut veteranen voetbal. Nooit meer die sjieke derby's, nooit meer de gezelligheid en ut lekkere aete in de kantine. Heel erg joamer. Doarom vonj ich ut neit meer dan gepast om Roy te vroage om un versjlaag te make van zien letste activiteit es coach van de Haslou veteranen. En ich ben d'r hartsjtikke dankbaar veur dat Roy zich die muijte haet gedoan tiedes zien verblijf in Griekenlandj (aafsjeidskado van zien sjpelers).



Laes en geneit:

*Op vriedig woare os l tste wedstrijden es veteranen van Haslou. Nao ein haupvol begin in 2015 bleek ut de l tste jaore ummer l stiger om de luuj biejein te kriegen. Misjien volg der nog eine doorsjart es 7x7 team 45+ m r dan zonger ongergeteikende. Ich h b in fibberwarie aangegaeve klaor de mit te zin.*

*Es aafsjeeting van dees periode haw Caesar os gevraog om mit te doen aan hun veteranetoernooi. Nao ein oproop in ozze appgroep bleke der voldoende vets te k nne. Wie ut zw  wiet woar kaome der toch nog get aafmeldinge. Rich de Becker haw ziene Latino-*

*tinderdate op bezoek en Guy de Bint mosj mit ut vruike nao JBB in Beeg. Gelökkig brach unne oproop bie de pliesje nog resultaat. R.F. en G.K. (volledige namen maoge ivm privacy neet geneump waere) waale os waal oet de brand hellepe.*

*Ut programma begosj al direk mit de finale. Haslou taege de vrunje in ut gael/zjwart oet Aelse Noord(mien favoriete kleure vanwaege mien adoraatsie mit Roda JC en wo oud-Aelsenaer-Mark Lacroix eeders kjèr mit plezeer in sjepeelt). Zjwart/gael waar zonger coach dao. Willem mosj nog get sjtökke doornumme en Den Daom mosj mitdoon op ut NK-bommetje.*

*Nao eine serieuze warming-up van beide plooge, kaom de sjeids aangesjoggeld. Hae haw nog nwats ein finale geflaote en waar dan auch erg gesjpanne.*

*Ut begin waar veur de gael-zjwarte en Rob Sjulpe brach dan auch de verdeende 1-0 op ut fictieve scorebord. Hienao kreeg Aelse mjè grip op ut sjpel en dat resulteerde in get kanse. Eine knal van Oscar ging mèt sjus euver. Keeper Minion Ron(4 cm kleiner es ozze mini-Mike) begosj al mit tiedtrèkke door op zien gemaak de bal te haole. Kosbare tied ging hiedoor verlaore. Aelse bleef drökke en maakde oet ein van hun kanse via Mark Verhoeve de verdeende 1-1. Hienao begosj ut aaftaste. Aelse waar degene dae de aanval zog en naodat Hans Linsse ziene pegel gepareerd woort, sjoot hae in de rebound esnog raak. Paniek bie de gael/zjwarte mèt intösje waar Dennis Stelte gearriveerd. Zien vruike haw inins anger planne, wodoor Dennis dach, ich gaon nog effe mitdoon. Nao ein gooj actie van häöm kaom de bal bie Bart Pantus en dae sjoot vlak eur tied taegedraods in de lènkerhook de 2-2 bène. De finale waar onbesjlis.*

*Hienao sjeelde veer allebei nog taege Caesar en Nirbik. Alle wedstrijde woorte mit 2 vingers in de naas gewonne. Ut doelsaldo waar geliek. Veer höbbe toen Maurice de Not gevraag wat de pries waar. Eine trofee en 100 bonne. Omdat os priesekas opgeheve wurd, höbbe veer vriewillug afsjtand gedaon van de baeker en genogge genomme mit de bonne. Zwâ hauwe veer allebei get, gael/zjwart de baeker en Aelse de bonne. Veer höbbe waal ff mit de baeker môtte posere veur de camera van Rob.*




*Al mit al sjeete veer hiemit ein periode aaf, wo in veer ummer jhèl leuke wedstrijden taegenein hōbbe gesjepeeld. Auch neet te vergaete waore de belangrieke 3e hēllef.*

*Jonges, bedank veur al dees sjwan momente en veer komme os zeker nog waal urges taege.*

Roy.

Roy, hartsjikke bedank veur dien versjlaag. Sjiek om te laeze! En bedenk dich nog ens rustig in Griekenlandj ofse dat veursjtjel van Willem en mich neit geweun mos aannumme:



En veur alle Sjteinder voetbal leifhōbbers zou ich wulle zegke: bedank veur ut laeze van dees versjlage en un fijn vakantie toegewunsj!

Pes volgend seizoen!

Rob Sjulpe